

(/)

NOTICIAS

Portada (/index.php?lg=gal) » Concello (/casa_concello/index.php?txt=casa_concello&lg=gal) » Noticias (/hoxe/novas.php?lg=gal)

POLÍTICAS SOCIAIS

Santiago impulsa un Protocolo ante desafuzamentos cos concellos de Ames e Teo e tres colexios profesionais



Gonzalo Saborido, Xosé Ignacio Iglesias, Concha Fernández, Luisa Feijóo e María Rosa Álvarez.

(/imxd/noticias/imx/1486638286DSC02313.JPG)



Outro momento da rolda de prensa.

(/imxd/noticias/imx/1486638297DSC02350.JPG)

09/02/2017 A concelleira de Políticas Sociais, Diversidade e Saúde, Concha Fernández, deu a coñecer esta mañá os detalles do Protocolo de actuación para a prevención de desafuzamentos e a atención das persoas afectadas nos Concellos de Santiago, Ames e Teo. Na rolda estivo acompañada dos concelleiros de Servizos Sociais e de Benestar, respectivamente, destas dúas localidades, Luisa Feijóo e Xosé Ignacio Iglesias; da decana do Colexio de Psicoloxía de Galicia, María Rosa Álvarez e do vicepresidente do Colexio de Traballo Social, Gonzalo Saborido.

Este documento "é o resultado de numerosos meses de traballo e de xuntanzas da Mesa de Desafuzamentos" e quere dar "contido ao Convenio asinado en 2013 entre o CGPJ, a Xunta e a FEGAMP", tal e como sinalou Concha Fernández. A concelleira insistiu na importancia da colaboración institucional "para dar solución integral a problemas complexos como o caso dos desafuzamentos". Por iso participan concellos como Santiago, Ames e Teo, así como os colexios profesionais de Avogacía, Psicoloxía e Traballo Social.

O Protocolo ten como obxectivo previr que se poidan producir situacións de desafuzamento da vivenda habitual no ámbito dos municipios asinantes e xestionar os posibles casos que se poidan xerar neste territorio. Concha Fernández lembrou a importancia de "acudir aos servizos sociais nos primeiros momentos nos que poida existir risco de desafuzamento, xa que os concellos adoitamos ter coñecemento dos casos cando están xa moi avanzados".

Neste punto insistiu o edil de Benestar de Teo, Xosé Ignacio Iglesias, quen fixo un chamamento á veciñanza para que "acudan aos servizos sociais municipais antes de que estas situacións avancen" e destacou que o protocolo vai servir como "ferramenta para sistematizar as accións intentando que non queden buratos na rede".

Pola súa parte, Luisa Feijóo, concelleira de Servizos Sociais de Ames, sinalou que "este protocolo ten que ser una folia de ruta para axudar aos tres concellos sobre como debemos actuar ante estas situacións" e fixo fincapé na "colaboración entre as administracións e os colexios profesionais".

Tamén tomou a palabra a decana do Colexio de Psicoloxía, Rosa María Álvarez para lembrar que "a vivenda non son só catro paredes senón que é un proceso vital". De aí que sexa tan importante o papel que xoga o Colexio de Psicoloxía "no acompañamento psicolóxico destas persoas".

Finalmente, Gonzalo Saborido, vicepresidente do Colexio de Traballo Social, puxo o foco "na colaboración intermunicipal" e na posta en común destas actuacións a través dos colexios profesionais, que "somos quen máis contacto temos coa sociedade civil e as plataformas e ONG".

Mediación e acompañamento

Destinada a aquelas persoas que, como consecuencia do seu empobrecemento ou insolvencia sobrevida, non poidan facer fronte ás contías dun préstamo hipotecario e fosen requiridas xudicial ou extraxudicialmente. Tamén se dirixe a aquelas persoas que non poidan sufragar as rendas previstas no contrato de arrendamento.

O Concello ofrece asesoramento legal e psicosocial grazas ao convenio asinado cos colexios de Psicoloxía e Avogacía e a participación neste Protocolo do Colexio de Traballo Social. Tamén se tramitarán de forma urxente as axudas sociais ás que se poida acceder e que no caso de Compostela están incorporadas na ordenanza de garantía básica cidadá *Compostela Máis*.

Tamén se dará información sobre as posibilidades de solicitude dun avogado ou avogada de oficio e acompañarase a esa persoa durante todo o proceso, elaborando informes sociais e realizando as xestións pertinentes para conseguir unha reestruturación do préstamo, dación en pago ou quita da débeda.

Realizarase a necesaria intermediación co Instituto Galego de Vivenda e Solo e a mediación oportuna entre a persoa afectada e a entidade financeira para acadar un acordo entre as partes e, no caso, suspender ou prorrogar a data sinalada para o lanzamento.

Protección

Dirixida a aquelas persoas que se ven obrigadas a abandonar a súa vivenda por terse producido unha orde xudicial de lanzamento. O procedemento iníciase cando o xulgado remita dita orde aos servizos sociais e xurídicos do Concello ou cando unha persoa requira directamente a nosa intervención.

O obxectivo pasa por mobilizar os recursos municipais orientados a garantir alternativa habitacional ás persoas afectadas polos desafuzamentos nos tres concellos. Ofreceráse mediación coa entidade financeira ou propietario/a da vivenda, xestión dos trámites da xustiza gratuita, apoio psicosocial, comunicación á Xunta da situación de desafuzamento e tramitación da solicitude dunha vivenda social á Comisión Provincial do Instituto Galego de Vivenda e Solo.

No caso de producirse lanzamento da vivenda habitual, os e as axentes da Policía Local que estean presentes no momento do lanzamento proporcionarán o modelo escrito de aprazamento do lanzamento á persoa desafuzada, así como a intervención do Concello e a posta en contacto coa concellaría responsable.

Documentos relacionados

- Folleto informativo (/imxd/noticias/doc/1486637868despregable-desafuzamentos.pdf)
- Protocolo (/imxd/noticias/doc/1486637879Protocolo_municipal__desafuzam.pdf)

Compartir:

- Concellarías (/casa_concello/interior.php?txt=cc_concellarias&lg=gal)
- Xunta de Goberno (/casa_concello/interior.php?txt=cc_goberno&lg=gal)
- Pleno (/casa_concello/interior.php?txt=cc_pleno&lg=gal)
- Grupos municipais (/casa_concello/interior.php?txt=cc_grupos&lg=gal)
- Alcaldía (/casa_concello/concellaria.php?txt=cc_alcaldia&lg=gal)
- Comisións (/casa_concello/interior.php?txt=cc_comisions&lg=gal)
- Servizos municipais (/casa_concello/servizos.php?txt=es_servizos&lg=gal)
- Raxoi (/casa_concello/interior.php?txt=cc_raxoi&lg=gal)
- Guía de comunicación (/casa_concello/enderezos.php?lg=gal)
- Noticias (/hoxe/novas.php?lg=gal)
 - Buscador (/hoxe/buscador.php?lg=gal)
- Servizo de Prensa (/hoxe/prensa.php?lg=gal)
- Contacto (/contactos_concello.php?lg=gal)
- Subscrición (/hoxe/subscricion.php?lg=gal)
- Axenda (/hoxe/axenda.php?lg=gal)

Concello de Santiago



Pazo de Raxoi. Praza do Obradoiro
15705 Santiago de Compostela (A Coruña)



(+34) 981 542 300 (Centralina) (tel:+34981542300)



(+34) 981 542 357 (Alcaldía) (tel:+34981542357)



informacion@santiagodecompostela.gal (mailto:informacion@santiagodecompostela.gal)

Noticias (/rss_novas.php) Avisos (/rss_avisos.php) Convocatorias (/rss_convocatorias.php) Axenda (/rss_axenda.php)

Guía de comunicación (/casa_concello/enderezos.php?lg=gal) Mapa web (/mapaweb.php?lg=gal) Aviso legal (/avisolegal.php?lg=gal) Accesibilidade (/accesibilidade.php?lg=gal)